

鄉土志叢編

張國淦署





城固縣鄉土志目錄

歷史 建置沿革附表

政績錄

兵事錄

耆舊錄 附名宦 鄉賢 忠義 節烈

人類

戶口

氏族

宗教

實業

地理 附古蹟 祠廟 坊表 橋梁 市鎮

山

一

三

五

七

一六

一六

一七

一七

一七

一八

二一

水

一三二

道路

一三四

物產

一三七

商務

一三七

城固縣鄉土志

歷史 建置沿革

案 大清一統志云縣境爲禹貢梁州之域春秋時屬蜀地戰國初屬秦楚之境秦置漢中郡其時俱無縣名漢初置漢國後仍爲漢中郡置縣曰成固縣又置安陽縣於成固境內漢末張魯改漢中爲漢寧魏武復曰漢中郡三國時屬於蜀安陽縣徙廢以漢中爲重鎮魏景元四年克蜀兼置梁州晉因之俱以成固縣爲屬地晉仍其名爲成固縣屬梁州東晉兼屬秦州治宋更名曰城固縣宋齊屬梁州漢中郡兼屬南秦州梁天監三年入於魏曰梁州漢中郡城固縣屬之大同初還屬梁西魏廢帝元年復克之隋開皇三年郡廢大業三年州廢改漢川郡以城固縣屬漢川郡唐武德初復曰梁州置總管府更縣名曰唐周貞觀初復舊名曰城固開元十年改梁州曰褒州二十年州復故天寶初曰漢中郡乾元初復曰梁州以城固縣屬梁州興元元年德宗以朱泚之亂狩於梁洋升爲興元府爲山南西

道節度使治五代興元屬蜀縣名無改宋以城固縣屬興元府漢中郡山南西道
節度使利州路治後又屬利州東路治崇甯中縣移治元以城固縣屬興元路陝
西行省明洪武三年改漢中府縣名因之 國朝仍爲城固縣屬漢中府讀史方
輿記要云城固舊城有南北二城在縣東八里北城漢縣治是也南城蜀將劉封
所築又建興七年武侯築樂城於成固舊志云樂城在今縣西十八里或曰卽故
南城後魏延昌初析南鄭城固二縣地置漢陽城後魏移縣於壻鄉始爲今治

歷代建置沿革表

商周	唐虞夏	縣境爲禹貢梁州之城						
國	春秋戰	春秋屬蜀地戰國屬秦楚之境						
秦		置漢中郡無縣名						
漢		初置漢國後爲漢中郡	置成固	縣又置	安陽縣	於成固	境內	
三國		成固縣屬蜀兼	屬梁州	安陽縣廢				
晉		成固縣屬梁州	東晉兼	屬秦州	治			
魏	宋齊梁	城固縣屬梁州	兼屬南	秦州				
隋		城固縣屬漢川	郡					

<p>元升旋漢又州州旋屬名觀梁周更武 府爲復中改旋曰改梁州城初 興又郡曰復褒梁州固復貞屬唐初</p>	<p>唐</p>
<p>城固縣 屬蜀</p>	<p>五代</p>
<p>城固縣 屬興元 府利州 路治後 又屬利 州東路 治崇甯 中縣移</p>	<p>宋</p>
<p>城固縣 屬興元 路陝西 行省</p>	<p>元</p>
<p>城固縣 屬漢中 府</p>	<p>明</p>
<p></p>	<p></p>

政績錄

宋

魯宗道亳州譙人祥符中爲縣令性介直誠信與人百姓愛之如父母不忍欺焉民陷於法宗道曰民失其道上之過也痛自克責民化於善後拜正言參知政事人目爲魚頭參政蓋因其姓言其骨鯁也

閻蒼舒太原人化民以德不任刑罰躬行禮義以身先之民皆悅服風俗丕變

楊從義鳳翔天興人漢太尉楊震之裔知洋州時葺築楊填堰大興水利漑洋州城固農田五千頃享年七十有八封開固侯累著勳績

薛可光字景孝河東人由縣尉升知縣事有文學諳世務率吏民以拒寇興水利以漑民田民懷其德故名其所築橋渠曰薛公渠

案通志可光作守先

元

蒲庸字時中鄜延人至元中爲邑令修五門堰改創石渠一道以通水利民蒙其惠立生祠於斗山之麓

城固縣志
三
明

曹璧山西魏山人監生持身以廉撫字得宜

葉壽江南高郵人時稅糧久逋民多鬻子賠償不完立爲奏除報額勸富民代輸撫綏備至遠近頌戴永樂間爲城固縣知縣

胡海江西饒州人以賢良方正任廉以律已施爲有方民多感慕成化間爲城固知縣

趙思仁直隸昌平人舉人宏治中爲城固知縣和緩清平愛民守已

郝晟字景陽歷城人宏治壬子攝縣事重鑿五門堰石渠大興水利民懷其惠

周盛漢中府通判其邑里無考正德七年蜀郡盜起掠漢中境盛攝縣事增築城垣民賴以安

李完四川合江人監生奉公守法吏民畏懷爲城固知縣

易宏貴州人舉人以本縣教諭升本縣知縣政教廉舉士民感慕正德間任城固李材河南邾縣人舉人治才敏捷法令嚴密見重於當道地方賴以安謐爲城固

知縣

劉振山西平陽人舉人爲城固知縣政善民懷教養兼舉

經希廣西人爲城固知縣催科不擾興學愛民

范時修四川城都人舉人清廉愛民力勤堰務造祭器於學宮建農亭於郊野爲城固知縣

楊守正直隸良鄉人監生寸衷自盡六事咸修新學校課農桑興復射圃任城固知縣時嘉靖中四野豐稔

熊讜湖廣麻城人舉人城固知縣均稅糧致民殷富奉檄征寇民獲安息
喬起鳳山西安邑人舉人城固知縣重修文廟勤築堰渠官至太僕寺卿
景章四川富順人召募里甲節用愛人城固知縣

劉振益南部人築磚城省力役愛惜里甲民享樂利城固知縣

高登明山西翼城人舉人城固知縣創修高堰造士恤燬民蒙惠利

劉克義邑里無考萬歷壬午爲城固縣知縣與教諭蕭子松訓導馬子馴主簿薛

子文捐俸重葺文廟人才蔚起

賈崇真河南宜陽人萬歷己酉宰城固疏通水利建葺城垣民立去思碑

程三樂四川重慶人舉人萬歷中城固知縣招礦工俞士乾等賊就擒斬謀畫夙優地方安戢

周學閔山西曲沃人舉人天啓中城固知縣時瑞王過境調停供應人民安堵

司五教直隸內黃人貢生時李自成黨田見秀陷邑城索印五教堅志求死不與急索之五教抗罵不屈賊寸磔於市奏祀名宦崇禎末城固知縣

典史李驥四川新繁人監生公平有爲考滿民懷其惠詣部保留

袁失名西蜀人正統間爲縣令與教諭蒲清訓導房端捐資重建學宮

教諭邵世祿山西河津人選拔貢生年青學博教勤升延安府同知

訓導牛紳河南尉氏人時明倫堂逼城東規模狹隘乃率生徒請於當道捐俸改

建更立程勸學科第聯翩

馬中騮直隸東光人進士以才品調繁長安將行而死兩地思憫

國朝

毛際可宰城固重築五門堰濬堰渠益深建養濟院以養窮民鰥寡孤獨咸懷撫恤

胡一俊宰城固重築五門堰躬親勤勞較舊工愈完固水利復大興

張仕憲字簡碩江南宜興人剔奸釐弊布愷敷仁緩徵減刑禮賢下士民立去思碑

王穆江南雲間人康熙間攝城固事有惠政捐俸助葬建築通衢道路鑿井城中以利民汲重撰城固縣志有惠政於民 以上城固縣志

以上均照興利去害聽訟編年總錄

案康熙以後縣志迄今未編纂政蹟無可考故所載止此惟同治初總兵蕭德麟字翰卿湖南人以楚軍安輯城固捐米三百石屬邑紳盧觀光易良田多畝積款垂四十年近年穀錢利息爲城北五門堰歲築之資將來永免每歲案畝派錢於民有功於水利尤大士民稱頌附錄之

兵事錄

蜀漢

後主建興八年時魏明帝太和四年秋八月漢丞相亮聞魏兵至次於成固赤坂以待之 記事本末

魏

甘露三年漢主令督漢中胡濟郤住漢嘉監軍王含守樂城護軍蔣斌守漢城
甘露四年詔諸軍大舉伐漢鍾會統十餘萬衆分從斜谷駱谷子午谷趨漢中漢
人聞魏兵且至炎興中敕諸圍皆不得戰退保漢樂二城城中各有兵五千餘人
景耀元年十二月詔漢中兵屯漢壽守漢樂二城

炎興元年魏遣鄧芝鍾會入寇漢中鄧芝諸葛緒各統諸軍分從斜谷駱谷入蜀
令諸圍皆不得戰退還漢樂二城蜀監軍王含守樂城護軍蔣斌守漢城會使護
軍荀愷圍漢城前將軍李輔圍樂城其後鍾會攻圍漢樂二城蔣舒開城出降守
將傅僉格鬪而死

晉

懷帝永嘉元年夏五月秦州流人鄧定反寇漢中據成固梁州刺史張殷討之不克殷遣巴西太守張燕討之定等詐降求救於蜀主李雄雄遣太尉離等將兵二萬大破燕兵愍帝建興元年張光遷材官將軍梁州刺史逆賊王如餘黨李運楊武等自襄陽將三千餘衆入漢中光遣參軍晉邈率衆於黃金拒之邈受運重賂勸光納運光使運居成固後邈讒運勸光掩取之光遣邈討運不克以上陝西通志

唐

蕭宗寶應初奴刺黨項寇城固

方輿紀要

代宗廣德二年十一月吐蕃入寇帝次陝羣盜徧南山五谷詔李抱玉討賊分兵守諸谷使牙將李崇客率精騎四百襲之賊帥高玉脫身走城固山南西道張獻誠擒以獻索支黨斬之不閱旬五谷平

僖宗光啓二年朱玫等追逼車駕三月帝至興元詔以晉暉及神策軍使張造帥兵屯黑水黑水在城固縣西北太白山南流入漢

昭宗天復二年秋八月西川軍假道於興元節度使李繼密遣兵拒之西川前鋒將王宗播攻之遂破金牛黑水

注見前西縣襄城四塞

宋

寧宗開禧二年陝西安撫使吳曦叛降於金五月興元軍亂興元都統秦世輔出師至城固縣軍大亂

明

洪武二年秋七月僞夏吳友仁寇興元時徐達在西安得報卽帥師還屯益門鎮先令傅友德率兵三千逕趨黑龍江夜襲木槽關攻斗山巖下令軍中人持十炬燃於山上友仁軍見列炬起大驚乘夜遁去

崇禎七年夏四月湖廣賊趨漢中漢中知府斷棧道守鷄頭岡賊不得前間道犯城固洋縣官兵禦卻之

以上陝西通志

崇禎十六年流寇陷城固

一統志

崇禎末山民據險稱亂知縣司五教率兵擒斬之

一統志

國朝

嘉慶二年冬十二月白蓮教匪賊目冉學勝掠留埧廳西江口由下南河沙嶺桅杆石入城固陷慶山砦守砦貢生尙希誠徵舉孝廉方正廩生尙彬生員田性天廩生趙觀武生王增印處士田德田福及鄉勇多人死之

同治元年蜀匪僞鄧天王藍大順藍二順及黨羽數千人入漢中竄擾縣境分據縣北之寶山斗山爲險要同治二年粵賊逆黨復入漢中旣陷府城遂入縣境時藍逆已陷洋縣與之相犄角秋八月二十四日復同陷縣城知縣文運熙前任知縣李德鍾訓導張倉死之紳民殉難者甚衆同治三年春正月賊退去

耆舊錄

漢

鄧先邑人景帝時爲校尉擊吳楚還帝問七國聞誅量錯兵罷否對曰七國反謀已久以誅錯爲名意不在錯錯患諸侯強大不可制請削之以尊京師萬世之利也計畫始行卒受大戮內杜忠臣之口外爲諸侯報仇竊爲陛下不取也帝喟然

曰吾亦悔之

城固縣志

張騫成固人爲人強大有謀能涉遠爲武帝開西域五十二國窮河源南至絕遠之國拜校尉從討匈奴有功遷衛尉博望侯至今方外開通騫之功也

陝西通志

張猛字子游成固人以光祿大夫給事中侍元帝當廟祭濟渭欲御樓船御史大夫薛廣德當車免冠乞剗血汗車輪帝不悅猛進曰主聖則臣直今乘船危就橋安聖主不乘危故大夫言之帝曰曉人不當如是耶後爲幸臣宏恭石顯所譖毀猛自殺

陝西通志

陳雅字伯臺成固人靈帝時爲諫議大夫闕宦用事上疏不省出爲巴郡太守年

七十五卒臨終戒子薄葬

陝西通志

陳綱字仲卿成固人少與同郡張宗受學南陽以母喪歸宗爲安衆劉元所殺綱免喪往復之值元醉臥還須醒乃殺之自拘有司會赦免三府並辟舉茂才拜宏農太守初至有兄弟相訟自責引退後無訟在在官九年卒天子痛惜賜家錢四

十萬

陝西通志

唐

崔覲成固人以儒自業身耕耨取給老無子乃以田宅貲財分給奴婢各爲業而身與妻隱南山夫婦嘯詠相視爲娛文宗時左補闕王直方薦覲高行詔以起居郎召辭病不至 陝西通志

明

賈古昇邑人永樂癸未進士歷官都御史正直敢言歸休後能興水利爲人所頌

城固縣志

劉勉邑人永樂間進士官庶吉士博極羣書多所發明時稱宗匠 城固縣志

廉傑邑人嘉靖時舉人官沁州知州有善政子汝爲己酉中式舉人爲應州知州守正不阿掃除積弊州人德之曾孫第萬歷庚戌進士令南漳歷郎署由郡守而躋臬司年方強仕卽賦歸來閉戶著書心嚴義利崇禎間撫按交章薦用惜以病

終 城固縣志

方策邑人爲諸生以孝友聞嘉靖丁酉舉於鄉任靈邱有政聲致仕歸誦讀耕鋤

之外不屑問也 城固縣志

黃九成字引南城固人嘉靖丙辰進士授戶部主事升員外郎監稅崇文門盡汰溢額以清慎著名尋升郎中權蕪關稅務以餘金充上額二萬升臨清道副使告

歸 陝西通志

吳仕夏邑諸生性最孝父病嘗其糞母亡寢處不離於父三年茹素未嘗忘親也

城固縣志

張景誠父有瘡患罄家以求醫親為吮之不治躄踊哀痛幾於滅性如是者三年

城固縣志

劉恩幼喪父孝事母母沒廬墓三年哀毀骨立嘉靖四十三年縣令楊永茂表其

閭曰篤孝 城固縣志

黨傑字子興隆慶丁卯舉人性剛果沈毅每以忠孝節義自矢官榆社教諭升文安知縣循良大著擢南京御史條議江防事宜後因建儲直言見忤時宰左遷東昌知府遂掛冠歸神宗每言黨御史疏奏激切內多懇語實有可採欲大用之而

傑卒 陝西通志

黨中疇字易甫傑子萬歷庚戌進士初任交河知縣詢民利苦力爲與除障黃河得淤地甚廣人咸頌之尋考選假歸值歲饑中疇立廠煮粥活人萬計日在粥廠遂中疫死城固人爲建碑紀德 陝西通志

李必達字中孚城固人萬歷甲午舉人性倜儻不羣精奇門遁甲歷官遵義副使天啓間奢賊陷重慶必達畫謀決勝攝服賊衆稱爲神兵在川十餘年控制有法殘孽不敢逞後罷職川人感慕立祠祀之 陝西通志

石可礪字用汝萬歷乙卯舉人知寶豐縣時舉人牛金星居鄉肆惡又納族妹爲妾被告可礪奉審執法無徇金星懼逃投闖逆及陷西安金星欲復舊怨遣人搜獲可礪囚禁挾餉備受酷毒可礪不屈仍指數前事殺於紅芝驛 陝西通志

張鳳翮天啓乙丑進士擢御史巡按雲南衡文江左因論事遷浙臬尋升江西巡撫少而力學爲人倜儻不羈嘗曰功不先梓里何以及天下故得志後開城東之新堰築南樂之義堡惜遭李自成之變執之脅其仕不從而遇害 城固縣志

方振寰字斗華崇禎丁卯舉人任山東福山知縣城破死之

以下陝西通志

岳中衡城固貢生崇禎末賊至爲所執呵之跪不屈誘以官猶不屈曰我已成貢士肯爲汝賊官耶爲亂刃所斃

葉孕秀城固人任汝州經歷母蕭氏年八十餘齋心奉釋氏偕弟孕莪侍疾屢禱母老棄官歸捐己貲修橋梁道路堰渠崇禎末寇擾同弟孕莪築堡避亂者生全以萬計道府題其堡曰仁里敦睦宗族累世同居

譚達蘊城固人性端謹幼以奇童稱比登賢書奮勵以古人自期學者宗之知與不知行稍有所失動相戒曰無爲譚夫子知也著述不傳於世入 國朝講躬行之學不輟卒於家

關學編

國朝

周基昌城固貢生順治元年英王西略從大兵至延安二年招撫興漢及四川保甯諸處有功三年賀珍寇漢中基昌單騎潰圍赴省請救家人悉遇害賊平授直隸保定通判七年大兵下川南調基昌從徵八年以功授叙州府知府甫半載劉

文秀自滇窺蜀城陷不屈死妻王氏守節撫孤歷五十四年年七十有二卒子志道孫元侯皆游庠

陳躍馭以從軍功授關南中軍守備順治三年冬勦黑水峪得賊首高勳以歸四年隸寧夏總兵劉芳名勦馬德李彩王永強劉宏才俱有功制府孟喬芳拔授游擊康熙元年隨征雲南招徠賊首彭長庚等搜箐平諸峒先登陷陣斬獲無算又率衆次涖列大捷攻牛鼻峒匝月賊出降以功升四川參將卒於官

馬文秀城固人積功至臨安鎮游擊時滇省初入版圖康熙三年土目王朔等偵知總兵閻鎮赴水西率衆襲城守者來告急鎮未發文秀曰請先之即倍道疾馳而至賊亦後至攻城文秀以奇兵急擊之賊潰賊糾集諸蠻大進文秀勸鎮以計取之鎮不聽戰敗越三日賊攻益急鎮大恐文秀曰賊驕矣衆心懈可擊之疾逼之弩不及發技窮矣引兵張兩翼出擊文秀先登諸軍死戰傾其巢穴以功進副總兵因疾歸卒於家以上陝西通志

張拱極母病侍湯藥三年不解衣帶祝天願以身代母病愈爲朝邑訓導一載以

憂歸年九十一著有瓦釜集歸隱錄今不傳

梁天植明末父衡爲賊執天植追隨不忍離後父子乘間脫去入山谷負其父日行數十里未罹害中順治乙酉舉人

趙元惺父京仕天啓壬戌進士以洪洞令擢工科給事中以事謫官歷轉通政司左參議李自成之亂一門被執母楊氏年六十賊索餉加以炮烙惺哀號擁抱乞以身代賊將殺之就戮無懼色賊義之與母俱釋後京仕入 國朝爲倉場尙書加少保惺奉父母以終

夏錫攸市民也孝事母傭身以供菽水母病奉湯藥廢寢食禱天願以身代母死割股入藥以進越二日母病愈股肉亦如常

李汝甯邑之望仙營人先世有元芳者官別駕性寬和治家以孝弟三世傳至汝甯男婦臧獲千餘人克遵義訓合爨同居

方振寰邑之孝廉也與弟諸生耀寰素友愛刻不忍離家人或議析居者振耀相抱而泣自是不復言耀妻張氏中丞鳳翮女凡飲饌衣服必先夫之兄嫂而後御

人以爲難

許無疆父名中贄崇禎末李自成之亂冒白刃以救父母生事死葬如禮家毀於兵以產讓昆弟遨遊四方幾遍天下所交多知名士持齋茹素與妻王氏壽臻耄耄臺邑令榜其門曰耆英繼美一堂四世長子瑗登丙子賢書孫天魁天挺並列膠庠

黨以讓順治乙未進士授庶常歷侍講戊戌禮闈校士辛丑主考武場通籍八年卒於京邸遺橐只有三金交知爲之備殮有果菴集行世

王納策邑諸生文場已隳而斥者再遂隱居不復應試著有蕉鹿園集

杜騰鳳專於理學以明體達用爲主從之者循循善誘後進宗之以上城固縣志

案康熙以後未編纂縣志耆舊無可考故耆舊止此均就事業學問可考者錄之

附錄名宦

宋

邑令薛可光

元

邑令蒲庸

明

邑令喬起鳳

邑令高登明

邑令楊守正

邑令司五教 以上六人事蹟俱見政績

教諭竇汝器事蹟今無考 凡崇祀名宦祠共七人

案名宦祠以前城中舊有三公祠祀故明都御史原傑僉都御史陝西巡撫藍

璋僉都御史邊億碑記稱其安置流民殲賊首惡修九邑城池特爲附錄

附錄鄉賢

漢

校尉鄧先

博望侯張騫

太尉李固事蹟具漢書今不備載

明

御史黨傑

交河令黨中疇 四人事蹟俱見耆舊

國朝

李天植邑生員蘇村里柳夾寨人兄弟三人事繼母孝教授生徒著名成材者甚衆品端學正名聞梓里聲動邑令人慕其德

高建瓴邑人高家村人道光間舉人爲廣東連平州知州有惠政告歸講學於城北斗山之學舍循循善誘弟子學成入翰林登賢書者甚衆子孫親受教育道光咸豐同治間登進士入翰林登賢書爲選拔貢生者數人仕宦不絕咸豐間建瓴以老病卒著有十三經輯說 凡崇祀鄉賢祠共七人

附錄忠義

國朝

文運熙 邑里無考同治初爲城固知縣城陷死節

李德鍾 邑里無考同治初爲文縣令前任知縣同守縣城城陷死節

張倉 邑里無考爲同治初訓導城陷死節

案忠烈祠今祀可考者只此三人餘忠義事蹟已於耆舊中以編年之例載入惟嘉慶二年教匪冉學勝陷慶山砦貢生尙希誠等死難今祀慶山昭忠祠事蹟久不可考故將姓名編入兵事中至同治元年寇亂楚軍戰歿者自知州羅正五鑾儀衛經歷羅如川參將黃星堂游擊楊子林凡二千餘人今祀城中昭忠祠紳民死難者六百餘人祀城中忠烈祠事蹟亦不可考

附錄節烈

漢

禮珪成固陳省妻也楊元珍之女生二男長娶張度遼女蕙英少娶荀氏皆貴家

豪富禮珪敕二婦曰吾先姑母師也常言聖賢必勞民者使之思善不勞則逸逸則不才吾家不爲貧也所以粗食給吾者使知苦難耳二婦再拜奉教從孫奉上微慢珪抑絕之感悟革行遭亂流行宗表欲見之必自嚴飾從子孫侍婢乃引見之曰此先姑法也四時禮祭自親養牲釀酒曰夫禮祭之尊也年八十九卒惠英亦有淑訓師母之行者也

陝西通志

陳順謙成固人適鄧令曹寧十九寡居長育遺孤八十餘卒兄弟陳規著書歎述之惠謙適張亮則在扶風官下吏白欲重禁嚴防以肅非元修訪於惠謙惠謙曰恢宏德教養廉免恥五刑三千蓋亦多矣又何加也兄弟伯思學仙道惠謙戒之曰君子疾沒世名不稱不患年不長也且夫神仙愚惑如繫風捕影不可得也伯思乃止陳伯臺稱云女尙書之後耳

陝西通志

明

劉氏貢生湯銘妻十九歲夫亡子文秀甫一歲姑以青年勸其他適氏曰願以未亡之身爲夫衍此宗嗣孀居六十三年而歿享年八十有二

陝西通志

方氏適生員杜臣年二十三歲臣亡氏痛哭毗盡裂撫二子忍痛存孤後子元吉爲學博元功爲生員氏七十九歲而終邑令題其門曰一生孀節苦千載母儀香趙氏諸生夏文炳妻也年二十七文炳亡甘貧撫孤俱得成立孫雲爲諸生守節二十七載卒

夏氏邑民王善繼妻二十五歲而夫亡有勸氏再嫁者氏曰從一而終義也教子成立孀居五十一載

王氏里人韓仲才妻也夫死方二十六歲遺孤得名甫七月耳氏撫而教之及長以孝聞於鄉氏守節五十七載

周氏諸生張嘉猷妻也年二十二嘉猷卒氏依夫之叔父母撫孤足不出戶者幾四十年教子鳳翮成進士官中丞崇禎間奉旨建坊題爲完節

岳氏年十六諸生王槩子未婚妻也寇入其家欲辱之不從賊怒以刃三斷其身張氏生員李爲範妻二十二夫死親黨憫其少勸再適氏不應入室服毒出語人曰我從此辭矣言已毒發而死邑令梁州傑旌其門曰矢志從一

岳氏貢生中衡女也年十八未字逆寇入漢中攻城急衡語家人曰城破我不偷生若等宜自爲計女厲聲曰孝經列女傳庭訓久矣父不惜死兒敢偷生遂以刃自剄賊至衡立而罵之亦被殺

李氏邑諸生李芳苑之妹也適張拱壽年十八高傑寇亂避於谷口與寇遇豪首欲奪之氏罵不從賊怒碎其身死

國朝

黨氏邑諸生王鉉妻也年十九鉉故時有利其再嫁者誓死不從兄琬憐其志爲之築室計用請大歸於黨而成其節

鄢氏適庠彥段陞陞亡氏年二十子袞方三歲守節安貧教子成立卒年七十

趙氏杜完妻也年二十餘夫死子毓鳳方三歲舅氏欲迎歸而再嫁之氏嚼指拒之曰我不死者爲杜氏孤耳遂與絕往來後子列諸生子婦又相繼而亡孫棠未彌月復育之成立爲諸生氏年九十卒

胡氏庠生杜運緯之妻也年十七夫死無子撫伯氏子彌月子長書爲嗣迨長書

入泮忽語家人曰我事已了當從夫於地下矣無疾而逝年三十有七

黨氏許無愆妻夫亡欲死者再念子瑄方七歲強存身以撫育內睦親族外禦強侮卒保子瑄成順治己亥科進士年八十一終

李氏萊陽令梁衡妻也年十七隨夫任萊陽值寇至能左右衡守禦萊陽得保全後歸里夫亡兵荒迭起拮据撫育其子復震爲弟子員享年七十

張氏鄭啓泰妻也夫亡欲以身殉家人防甚密至虞祭遂自剄

張氏黃鐘妻夫歿哀痛不已自剄死

黨氏王爾麟妻年十九而寡吳逆僞將欲娶不從將刼之氏沐浴紉裳再拜夫柩前從容自縊

閻氏廣文張士英妾也鄆州歸遇寇家人俱被擄氏義不受辱投崖死

戴氏李沐潤妾也隨夫入蜀夫死哀痛欲絕扶襯歸泣拜畢以腰縊自縊死

饒氏適劉振祚年二十二吳逆兵至人驚避氏與夫相失疑夫死抱嬰兒投水死廉氏生員黨瑤妻也年二十夫死孤兒以諗甫五月氏痛夫死自經者再僕婦勸

之曰主死是呱呱者將誰寄氏感動不死勤儉自持教子成立守節五十餘載而終

張氏中丞鳳翮女適諸生譚明義年二十二而夫亡上有衰年之姑下遺學生二子體質體實氏以一身克盡孝慈二子相繼爲孝廉年登耄耋潘輿迎養可謂榮節矣

陳氏里民李應麟妻年二十夫死仰事俯育一身肩之後翁姑歿世子亦繼亡又撫其孫爲弟子員年幾百歲而終

呂氏諸生韓之荆妻夫遊學不歸氏經歷兵燹事姑孝律身嚴教其子詩莪成名治家勤儉日趨充裕女中之傑也

王氏里人周基昌妻年二十生子志道一歲耳夫死於難歸依兄嫂守志卒教其子列於庠

王氏里民王懋功女也年十二許字同里蔡起麟閱數載氏母卒父憐其失恃謀遣嫁女以母服未闋止之甫三年起麟縊死氏欲奔喪父不許將圖改適也一日

乘父他出給隣家童子導之往蔡遂留事舅姑不復歸事聞何令以志存節孝額旌之

陳氏七星寺里民黎廷鐸妻年三十五歲戊戌年姑邢氏遘危疾延醫不治氏割股作羹以進姑病忽愈時署邑令王穆旌其廬曰割股孝婦蓋以勸世之爲人婦者而並以愧世之爲人子者

秦氏庠生鄭以德妻年二十二歲夫亡堅志守節孝養其舅送終以禮教二子皆成名巽序年近古稀一生苦節

王氏明扶溝令許無奇繼室崇禎末城陷氏遍體衣皆縫紉欲自經賊至將執氏罵不絕口死於亂刃

鄭氏民許無息妻年二十八夫亡矢志柏舟撫子璿列庠孀居四十餘年壽七十
三卒青年失偶白首完貞

王氏庠生朱色炳妻年二十九而夫亡哀痛幾絕欲以身殉因念孤兒紹文甫五歲家貧無依忍死携子往母家守節紡織自給和丸教子紹文中康熙辛卯科舉

人壺範宜待旌獎

黨氏庠生趙懋才之妻夫亡守志氏母憐其幼而無子勸改適氏柏舟自矢撫養親姪趙暘承祧上事翁姑以孝稱教子列庠婦道無慚

張氏庠生許天牧妻年二十二夫亡苦志守節飲荼茹苦善教子錦入庠

王氏庠生張國帽妻年二十四而夫亡撫孤守節事舅姑以孝聞於鄉家貧紡織課二子讀書均得成名

劉氏庠生何繩祖妻青鸞甫合鴻鵠隨悲矢志松筠撫孤兒而勤勞是訓盟心金石奉孀姑而色養母違子維祺名列府庠又復克孝高堂共慕完貞

劉氏年二十二夫庠生趙嵩病故止生一女父曰與其慷慨死節何如從容而就義乃立兄峒子志燮爲嗣亦生有子是使宗祧不絕者氏力多焉年六十餘卒

王氏孝廉朱紹文之母堅貞立志淑慧持躬年未三旬賦柏舟以自誓身嘗百瘁處窮困而彌堅紡績事翁姑媳能代子拮据供燈火母可兼師以故天憐苦節子

登鄉薦 以上城固縣志

王氏李德長妻夫亡守志撫孤姑楊氏久病不肯服藥氏嘗長跪以進姑始一嘗已而竟愈德長弟德昇妻伍氏德昇弟德發妻范氏皆早寡娣姒三人以志節相勵同居無間言稱一門三節乾隆間詳請 旌表 一統志

案節烈自康熙以後縣志至今未撰多失考同治初縣境賊擾婦女死難者七百餘人名列節義祠事蹟不存故所載止此

人類

縣境舊只漢回兩族回民無多皆奉教有年非真阿刺伯人其旗戶及回番畬獯苗犛獐狍豺狼皿狹打牲貂黎土司各種人俱無地與四川接壤非如鄰邊徼者多異種之民焉

戶口

縣志稱士敦禮讓守詩書農一歲兩獲無餘粟然康熙以來休養生息百餘年蔚爲繁富之區嘉慶初教匪入縣北境陷慶山砦殺戮守砦士民旋爲提督楊遇春勁旅滅之而縣之全境人民安堵如故至道光咸豐間農多飽煖商裕貨財縣境

世家望族閩里之民戶口滋繁稱極盛焉同治初蜀粵大盜陷縣城殺掠蹂躪寇賊既退戶口彫殘凶荒水旱傷痍未復同治七年霖雨縣南漢水北壻水漲溢漂沒田廬甚多光緒三年大旱飢饉斗粟千錢視道光咸豐間戶口之繁富異矣農商之業自光緒十年之後凡十餘年漸次充復光緒二十九年夏六月大水漢水漲溢漢水以南田廬漂沒邑令徐普請於大吏以帑銀賑之頻年以來粟米一斗糶錢五六百文居民較安堵焉

旗戶無

漢戶 男口一十萬零七千零四十五丁女口八萬七千四百二十八口 此數統漢戶回民天主教人耶蘇教人一併核計

氏族

城固大姓

國朝舊少土著明季寇亂以來自甘肅四川山西湖北遷居者一姓之民聚族於一鄉卽以姓名其地其中最著者如 國朝名臣康海康泰以武功顯事具 國

史康熙末其裔由甘肅張掖縣移家境內傳至近代累世科第仕宦不絕其餘如高氏則聚族於高家村至道光以來科第仕宦四世稱極盛焉其他地名雖存昔盛今衰矣其不以姓名地者如史氏吳氏田氏陳氏趙氏王氏賴氏尙氏寇氏徐氏韓氏李氏龔氏盧氏仕宦科第或二三世或一世盛衰不齊土著旣少譜牒無徵一族僅數十戶求如江南廣東之大姓一族多至數百戶得姓受氏本未可考則遠遜矣

宗教

回教人 男女共九十一丁口

喇嘛黃教紅教人舊無

天主教人 男女共一萬七千餘丁口

耶蘇教人 男女共一百零五丁口

實業

凡本境已入他教之人亦均在四民之內除他教計漢戶男女共一十七萬七千

二百餘丁口再除女口計男口一十萬餘丁

士居百分之五

農居百分之七十五

工居百分之十

商居百分之十

地理 據縣志陝西通志者均照中里核算據現今測量繪圖者均照米達核算

本境在省城之東南至省陸路一千一百五十七里計六十六萬零六百四十七米達水路無在漢中府城之東少北至府陸路七十七里計四萬三千九百六十七米達水路一百二十里計六萬八千五百二十米達

東至漢王城交洋縣界十里計五千七百一十米達

西至新鋪交南鄭界五十里計二萬八千五百五十米達

南至椒子坪交四川通江界二百零五里計一十一萬七千零五十五米達

北至桅杆石梁交留坝界一百八十里計一十萬零二千七百八十米達

東南至界牌交西鄉界七十五里計四萬二千八百二十五米達

東北至皂角灣交洋縣界二百一十里計一十一萬九千九百一十米達

西南至碗泉梁交四川通江界一百五十三里計八萬七千三百六十三米達

西北至太白梁交褒城界一百一十五里計六萬五千六百六十五米達

廣計三萬五千米達

縱計一十一萬米達

編戶二十四里係徵糧冊目曰樂城里 原公里 大安里 安太里 升仙里

蘇村里 重化里 永和里 懷仁里 安定里 豐樂里 安遠里 新化里

忻安里 遵道里 樂清里 新安里 文川里 通濟里 尊賢里 樂善里

陰平里 今廢 懷惠里 今廢 太平里 新增 里有十甲每甲小里一人花戶多少不

等小里輪催遞管本里

城內舊分七舖 六舖屬東關至界牌七舖屬大西關

城外舊分四十八地近年烟戶增加又添名目二十有五

東路 邯鄲村距城五里 蘇村距城十里 留村距城十里

西路 關王堡距城三里 沙河營距城十里 柳林舖距城三十五里 下新

舖距城三十五里 上新舖距城四十里 車家村距城五里 杜家營距城十

里 七星寺距城十里 安樂堂距城十五里 龍頭寺距城二十里 周公堡

距城二十五里 興仁堡距城三十里 文川東距城三十里 文川西距城三

十五里 孟家堡河東距城二十五里 孟家堡河西距城三十里

南路 龍王廟距城八里 袁家寨距城十里 太平村距城十五里 白路坡

山外距城十里 白路坡山中距城四十里 白路坡山內距城六十里 唐家

營距城十五里 霸王廟山外距城十五里 霸王廟山內距城三十里 南樂

堡距城三十里 南樂八牌距城三十八里 管家庄距城三十五里 五堵門

距城四十里 孫家坪距城六十里 沈家寨距城六十里 天明寺距城六十

里 大角寨距城八十里 卦福橋距城九十里 二郎埧距城八十里 東河

距城九十里 八角山距城一百里 小盤埧距城一百一十里 大盤埧距城

一百二十里 五郎埧距城二百里

北路 望仙營距城三里 五郎廟距城五里 軍王村距城十里 軍張埧距

城十五里 斗山前灣距城十五里 斗山後灣距城二十里 下丁家村距城

八里 上丁家村距城二十三里 東原公距城二十五里 中原公距城三十

里 西原公距城三十里 下方家營距城三十里 上方家營距城三十三里

昇仙口距城四十里 木槽口距城四十里 虎頭寨距城五十里 雞冠岩

距城六十里 板橙河距城七十里 水磴河距城七十里 濫埧子距城九十

里 雙溪河距城九十里 回子埧距城一百一十里 西公河距城一百一十

里 小河口距城一百二十里 桃源河距城一百二十里 磚溪河距城一百

五十里 老荒林距城一百五十里 石槽河距城一百八十里 北溪河距城

一百五十里 馬家河距城二百里

以上鄉村七十有三或合數村爲一地或卽一村分爲數地皆均道里遠近烟

戶多寡以爲編聯保甲每地舉報鄉約一人地方一人之定額

古蹟祠廟坊表橋梁市鎮 附學堂惟城內開辦高等小學四鄉皆初等款項粗
集正議照章辦理

城內三舖有明張巡撫鳳翻石坊工式堅卓俯臨闌闔刊南國文宗四字相傳爲
董文敏公書 行署察院在城隍廟街西今其基址久改米市尙仍昔稱 豐樂
橋在儒學之西上有觀音閣明嘉靖四十二年燬於火後修如前同治粵匪之亂
又燬 折桂橋在文廟樞星門前五十步上有折桂亭經明嘉靖邑令楊守正改
作久圯 魁星樓向在文廟東南隅明崇禎六年令梁州傑移建東城上燬於同
治之亂後經修葺如前 扁鵲城在縣西南四十里相傳扁鵲曾居於此郡國志
云城下有泉天旱以羊投之卽雨 張良辟穀處在縣東北三十里之白雲山
樊噲臺在縣北十三里上容百餘人傳爲噲所築 韓信臺在城東五里淮陰侯
築 妙巖院在縣北之斗山宋嘉祐八年賜額乾道中增葺有比丘道虞碑記其
文載諸縣志碑石廟址今俱無存 奉真觀在斗山之半唐竇真人得道處今只
存奉真洞有泉清冽可汲 薰香院卽寶山寺在縣東北十五里創於宋開禧時

經宋至明屢加修補殿閣雄麗杜陽院在昇仙口距城三十里剏自唐朝其地左環壻水右近伏牛岡阜盤旋林麓幽邃今經兵火均僅存規模 唐仙觀在縣東北二十五里王莽居攝二年名靈壽宮後因唐公昉拔宅昇仙遂易今名今存仙人公昉碑雖字多漫滅不傳撰入名氏而古拙枯老可與陽冰中郎並駕嗜古者寶之 黃帝廟在縣西南二十里漢王廟在縣東十里彭祖廟在少年山口祀商大夫彭祖伍子胥廟在縣北百丈堰張子房祠在縣北十里女郎廟在女郎山山上有女郎塚祀張魯女蒲縣尹祠在縣西二十里祀元蒲庸白鶴觀在縣南十里老君山唐僖宗幸蜀見白鶴翔舞其上因建是觀今祠宇均無可考僅據縣志陝西通志記之 漢丞相蕭何墓廟在縣西北二里杜家澗據括地志云其墓在咸陽東未知孰確 舞陽侯樊噲墓在縣西北十里黃家村 博望侯張騫墓在縣西八里今存二石形如臥虎列於墓前 太尉李固墓在縣西三十里有石碣題曰漢忠臣太尉李公神道今不存 七女塚在縣東北壻水經其處塚夾水羅布如七星高十餘丈周迴數畝元嘉六年大水破墳出銅不可稱計得一磚刻云項

氏伯無子七女造榭世人疑是項伯塚酈道元辨之見宛委餘編 宋楊將軍從義祠在縣北一十五里建於宋紹興年將軍靖康應募從吳玠立功晉爵安康郡開國侯卒葬城北之水北村今其墓碑尙存 壻鄉因唐公昉之壻得名相傳云公昉仙去壻留居此遂名其地曰壻鄉水曰壻水 木槽關在縣南三十里元末置東接圪兜坡南接天池山北距漢江西繞沙河通西鄉縣界今廢 北木槽關在縣西北三十五里元末置東連深背嶺南接浮遊山西繞獅子山北距亭子嶺通文川連雲棧明洪武初蜀將吳友仁謀復漢中守將金興旺請援徐達命傅友德以精騎三千逕趨黑龍江夜襲木槽關攻斗山巖今廢 南樂堡在縣西二十五里今名上元觀陰平鎮在縣南十八里蜀景曜中張翼董厥詣安陽口爲諸軍外助留住於此 袁揚鎮在縣北十甲卽今之七星寺 原公鎮在縣北二十五里 文川鎮在縣北三十五里與南鄭交界 段橋在縣東關外義民段友海建 張橋在縣大西門外義民張成建 葉家橋在縣西八里舊橋以木邑紳葉孕秀兄弟易以石上鏤石欄 望仙橋在縣西二十里斗山灣相傳張氏婦素好善

汲水山下數遇嬰兒乞乳依夫言以綵絲繫兒背後迹其絲至大松樹下拙之得茯苓大如斗取歸烹食舉家成仙 薛公橋在縣西北二十五里宋紹興間令薛可光開渠灌田民懷其惠橋因以名

山

縣城西北二十里一峯聳起形如斗杓者曰斗山道經云山有五穴通崑崙隴山武當青城長安穴有肉芝卽千歲蝦蟇得而食之可延壽明傅友德嘗率兵攻斗山砦卽此又北而西曰慶山在縣北三十五里山頂有烽堠故蹟赤土坡在其西南一名赤版其土色赭昔武侯曾屯軍於此以拒魏通關勢在縣北三十里壻水經通關勢南山高百餘丈上有匈奴城方五里濬塹三重高祖北定三秦蕭何守漢中欲修北道通關中故名山在壻水之北三嶠山在縣西北四十里上有三峯如覆鼎足中多靈藥西北與小光山接又北接九真山距縣城五十里道家謂大峯上有九真玉井是也迤東距縣城五十里曰珍珠山重巒疊疊如貫珠爲縣治發脈之祖山又西接天臺山距縣城九十里交南鄭縣界其西北達太平梁交褒

城縣界又有白龍洞者亦在縣西北之百二十里山崖高峻泉流潔清折由三嵎山東即鷄冠崖東連伏牛山一名浮遊山在縣西北三十里北接獅子山山距城四十里又北逾壻水曰聽山距縣城九十里相傳唐公昉仙去壻惟聞空中歌樂之聲故名聽也又北曰馬盤山在縣北百里坡陀縈紆二十里內有清溪三道南流合於壻水馬盤山之北接馬家山遞東相連曰野人山由此折而南逾壻水即白果坪爲板橙河發源處又南達滴水崖龍湫在焉天旱祈雨輒應其南向相對者曰龍泉山其西曰桃林山在縣北四十里又稍東曰五峯山五峯環列如屏滴水崖之東北接風高山上風洞怒吼不息又東北接青城山交洋縣界又南相連者曰白雲山神崖峙其東牛蹄山連其西駱駝山居其南龍泉山蠱其北多產藥物俗傳張良辟穀於此又南徼東曰寶山壻水流經其南麓與牛蹄山相連牛蹄山距縣東北三十里寶山距縣東北十里此皆縣北之山也 縣南諸山環峙漢江之南距城十里曰老君山東與霸王寨連爲南山入口處又南曰圪兜坡距城三十里稍南偏西曰天池山在縣南三十里山頂有天河池四時不涸歲旱取

水禱雨又南微東達大樹壩甯家壩又東南至雙乳山距縣城六十里兩山並峙如乳又西南曰青山又西爲觀音崖由此折逾南沙河達大嶺又南達寶佛崖又南山脈與太平梁相連牧馬河流經其南沿河西行達跪泉梁交通江縣界由此折而北行達十八盤山又北爲黃龍洞黑龍洞諸山是南沙河發源處皆巴山之支峯也又西北曰八角山又北逾南沙河曰大王嶺又北達佛耳崖南沙河流經其東麓沿河北上爲五郎寨卽南山出口處更轉而東至少年山距縣城四十里俗傳彭祖祈年於此與之相對者曰龍王山亦土人禱雨之地其山脈極爲延長鄉人以爲在縣治之南統謂之南山云

水

漢江自南鄭馬池渠入境北流五里計二千八百五十五米達過新鋪折而東流至蓮花寺而南鄭之班公堰從迴光寺入境南來注之又東流一十五里計八千五百六十五米達至大營埧文川河卽通志之門水縣志之北沙河自天台山發源向東南流經虎頭寨斗山灣李家河王家灣來注之又玉谷水源出文川口扁

鵲觀之龍洞流入文川水通志稱文水在縣西北四十里玉谷水在縣西北二十
五里其巴山黑龍洞發源之南沙河卽盤余水流二十里計一萬一千四百二十
米達經賈峪關過盤垣又北流三十里計一萬七千一百三十米達過二郎垣又
四十五里計二萬五千六百九十五米達至五郎關又一十里計五千七百一十
米達過唐家營折向東北流二十里計一萬一千四百二十米達過莫爺廟北來
注之會而東流二十里計一萬一千四百二十米達至關王堡小沙河水又從曹
家垣山溝流出徑向北流五十里計二萬八千五百五十米達至鹽井垣挾獅子
垣西流一水此水係從縣南孫家坪之分水嶺發源復北流經袁家營胡廣營苟
家渡來注之又復東流五里計二千八百五十五米達過城南門外又五里計二
千八百五十五米達過界牌橋又東微南行一十五里計八千五百六十五米達
過陳家山根出境入洋縣界 縣北之壻水通志統稱源出太白山又謂之聽山
水不知此源出自佛坪之阿當梁始繞廳城東北麓折向北流至洋縣皂角灣入
境遂西南流二十里計一萬一千四百二十米達過文家垣又西流六十五里計

三萬七千一百一十五米達經馬家河聽山至北溪河而馬盤山發源之水自西北來入之又南流一十里計五千七百一十米達至小河口高溪河水西來入之又南流一十里計五千七百一十米達至羅家營迂折而南行一十里計五千七百一十米達東受雙溪河兩水又南流一十五里計八千五百六十五米達西受平安溝一水又東南流三十里計一萬七千一百三十米達至小北河而白果坪發源之板橙河又從東來入之會而南流一十二里計六千八百五十二米達過慶山折向東南經斗山丁家村寶山蘇村兩儀橋計四十五里合二萬五千六百九十五米達出境入洋縣界迤邐東南流至藥樹村注入漢水按通志稱黑水南流入漢以諸葛亮牋朝發南鄭暮宿黑水爲証縣志載北河水源自太白山南流經縣入漢不知縣北除壻水外更無河行軌轍或今昔異名因地易名均不可知又通志稱潯水出自南鄭縣之旱山北經城固城南注漢水在漢水會盤余水會文川水之後今竟無考且與繪圖所載不符或當年縣城未改今治此水固在縣境之內歟至若五堵門河則從孫家坪之分水嶺發源經五堵門流入洋縣界黃

灘河則從西鄉縣山溝中流出北行至三岔河折向東行一十里計五千七百一十米達至孫家坪北納私渡河一水合流經土門堰過黃家埧至界牌計一十里合五千七百一十米達出境仍入西鄉縣界牧馬河則從巴山之涼水井發源東流三十里計一萬七千一百三十米達亦出境入西鄉界統注漢江是漢水固爲本境諸水總匯之區也

以上諸水惟漢水可通估舶其餘第有津渡水之大小漲落以天之旱潦爲率隆冬水涸時均設板橋利濟行旅然如壻水至小北河出山依山築堰西流爲邑之高堰灌田一千餘畝至慶山截河導水東流爲百丈堰灌田三千餘畝下游距百丈堰三里截河導之西流爲五門堰灌田三萬四千餘畝又二十餘里至丁家村下順水築堰東流爲城固洋縣共有之楊塢堰計灌城固田四千七百餘畝又至蘇村之下土人爲新堰灌田百餘畝此皆縣北壻水之獲利於本境者也至縣西之文川河有上官西小棗兒等三堰縣南之南沙河有上盤下盤萬壽陳小倒流新堰沙平平沙流沙等九堰小沙河有東流西流二堰或灌田數百畝或灌田千

餘畝皆爲本境水利所資視漢水之於本境僅通估舶者其利蓋有盈無絀焉

道路

東路 由城東行一十里計五千七百一十米達界碑交洋縣界通漢王城平壩
坦途爲赴洋大道

西路 由城西行三里計一千七百一十三米達西寨五里計二千八百五十五
米達老關廟五里計二千八百五十五米達司家鋪七里計三千九百九十七米
達沙河營五里大營壩一十里計五千七百一十米達柳林鋪一十里計五千七
百一十米達新鋪交南鄭界通十八里鋪平坦爲赴府大道

南路 由城南行八里計四千五百六十八米達李家營二里計一千一百四十
二米達湖廣營三十里計一萬七千一百三十米達鹽井壩五里計二千八百五
十五米達陳家廟一十里計五千七百一十米達元壩子五里計二千八百五十
五米達天明寺五里計二千八百五十五米達馬頭上一十里計五千七百一十
米達松樹菴五里計二千八百五十五米達汪家壩一十五里計八千五百六十

五米達曹壩有騎徑四十里可通盤壩一十里計五千七百一十米達白廟子一十里計五千七百一十米達西城寨一十五里計八千五百六十五米達蒿坪一十里計五千七百一十米達五郎壩一十五里計八千五百六十五米達乾溝一十五里計八千五百六十五米達寶佛岩二十五里計一萬四千二百七十五米達牧馬河又一十里計五千七百一十米達交四川通江界通椒子坪路有險夷

北路 由城北行二里計一千一百四十二米達望仙庵七里計三千九百九十七米達劉家村八里計四千五百六十八米達張家村五里計二千八百五十五米達丁家村相連東原公六里計三千四百二十六米達楊家灘七里計三千九百九十七米達小北河沿小北河有步徑六十里可達黑溝口一十里計五千七百一十米達涼水泉一十里計五千七百一十米達雞冠岩一十里計五千七百一十米達土堰一十里計五千七百一十米達石堰坪一十里計五千七百一十米達雙溪河一十里計五千七百一十米達羅家營一十里計五千七百一十米達小河口少西三十里計一萬七千一百三十米達沙窩子三十里計一萬七千一百三

十米達高溪河又一十五里計八千五百六十五米達交留壩廳通桅杆石梁荒
辟山徑險仄難行

東北路 由城北行一百零五里計五萬九千九百五十五米達小河口一十五
里計八千五百六十五米達北溪河口有步徑向北可達馬家山抵留壩老林三里計一

千七百一十三米達老荒林三十里計一萬七千一百三十米達石槽河口向東

有步徑可達馬家坪

一十里計五千七百一十米達馬家河七里計三千九百九十

七米達紅崖子五里計二千八百五十五米達黑溝口一十五里計八千五百六

十五米達文家壩又二十里計一萬一千四百二十米達至堵水入境處交洋縣

界通皂角灣 又由城小東門二里計一千一百四十二米達杜家槽七里計三

千九百九十七米達上蘇村五里計二千八百五十五米達留村交洋縣半個井

界鄉村小道

西北路 由城北行一十七里計九千九百零七米達張家村三里計一千七百

一十三米達唐仙觀二里計一千一百四十二米達五門堰三里計一千七百一

十三米達木槽口一十五里計八千五百六十五米達長溝店二十里計一萬一千四百二十米達小光山梁一十里計五千七百一十米達水磴河四十五里計二萬五千六百九十五米達交襄城大白堙險峭只可人行又由城一里望仙營五里計二千八百五十五米達方堰子五里計二千八百五十五米達七星寺五里計二千八百五十五米達龍頭寺五里計二千八百五十五米達孟家堡一十里計五千七百一十米達東文川向西一十二里計六千八百五十二米達至南鄭吳家廟一十二里計六千八百五十二米達上官堰二里計一千一百四十二米達老莊進山一十二里計六千八百五十二米達洞陽宮又一十八里計一萬零二百七十八米達交南鄭界通天台山路半多崎嶇騎行不易

東南路 由城南行渡漢江五里計二千八百五十五米達龍王廟五里計二千八百五十五米達秦家壩東行至陳家村三里計一千七百一十三米達圪坨坡二里計一千一百四十二米達二里山一十里計五千七百一十米達油房嘴五里計二千八百五十五米達黃沙鋪五里計二千八百五十五米達土地嶺五里

計二千八百五十五米達五堵門向東一十里計五千七百一十米達分水嶺通
洋縣梅子壩五里計二千八百五十五米達元山子五里計二千八百五十五米
達油房溝五里計二千八百五十五米達大樹壩五里計二千八百五十五米達
甯家壩五里計二千八百五十五米達孫家坪 東行十五里計八千五百六十五米達私
渡河折而南行可通西鄉 五里計二千八百五十五米達土門堰五里計二千八百五
十五米達界碑交西鄉界通沙河坎路半平坦亦能騎行

西南路 由城西南行一十里計五千七百一十米達湖廣營八里計四千五百
六十八米達莫爺廟六里計三千四百二十六米達余家營五里計二千八百五
十五米達上元觀向西十里至南鄭迴光寺折南一十里計五千七百一十米達
唐家營七里計三千九百九十七米達五郎關五里計二千八百五十五米達悔
家壩向西二十五里至娘娘山口五里計二千八百五十五米達元壩子一十五
里計八千五百六十五米達佛耳崖一十五里計八千五百六十五米達二郎壩
五里計二千八百五十五米達大王嶺一十里計五千七百一十米達寡婦橋五

里計二千八百五十五米達賈峪關五里計二千八百五十五米達茶葉河八里計四千五百六十八米達斷埡子一十里計五千七百一十米達凉水井過益碗泉梁二十四里計一萬三千七百零四米達交四川通江界通廣家店險峻難行

物產

動物產 麝香 牛皮 蠶絲 熊 豹 狐狸 野豕 麋 山羊 兔 山雉 錦雞

動物製造產 綢綾 絹 蜂蜜

植物產 薑黃特產 薑 罌粟 木耳 煙葉 棉花 烏藥 柴胡 前胡

蒼朮 半夏 橘皮 香附 大黃 柏子仁 巴黨參 芍藥 丹橘 黃

柑 西瓜子 甘蔗 稻 麥 黍 芋 竹 木 櫻 漆

植物製造產 棉布 煙膏 火酒

礦物產 銀質不精良久未開採 鐵據通志錄入今無考

礦物製造產 石灰

商務

縣境商務以薑黃木耳爲大宗薑黃每年產一百餘萬斤陸運銷行甘肅秦州十之一又水運銷行於湖北老河口鎮十之九由老河口鎮分水運陸運銷行於山西河南山東直隸以爲製造水煙之用木耳每年產一二萬斤水運銷行湖北又自沔縣略陽縣甯羌州分陸運水運購入本境三四十萬斤分銷湖北其餘牛皮每年產一萬餘斤水運銷行湖北乾薑皮每年產十餘萬斤陸運銷行甘肅新疆藉以避寒罌粟土藥每年產一萬餘斤陸運銷行南鄭各鄉又或自他境購入本境陸運分銷於本省水運分銷於湖北煙葉每年產六七十萬斤銷行本境及陸運銷行本省蠶絲每年產數千斤銷行本境製造綢綾陸運銷行本省及甘肅縣境藥材銷行之品惟麝香所產無多分銷別境如烏藥每年產三萬餘斤陸運銷行於甘肅新疆柴胡每年產一萬餘斤水運銷行湖北前胡每年產五千餘斤水運銷行湖北蒼朮每年產五千餘斤陸運銷行四川黃芩每年產五千餘斤銷行本境半夏每年產五千餘斤陸運銷行本省橘皮每年產一萬餘斤陸運銷行本

省香附每年產五千餘斤銷行本境大黃每年產三千餘斤水運銷行湖北柏子仁每年產二千餘斤陸運銷行四川巴黨參每年產一千餘斤銷行本境芍藥每年產三千餘斤銷行本境食品丹橘黃柑產於縣北之昇仙谷口近村每年獲數十萬枚銷行漢中府全境及陸運銷行本省爲土人之專利又西瓜子每年產一百餘石陸運銷行四川其有至他處運入本境單行之貨有白鹽青鹽棉布棉花四種白鹽由四川陸運入境青鹽由甘肅陸運入境每年各銷行數十萬斤棉布每年由湖北水運至本境四五十萬匹銷行本境無多餘均分銷本府及沔縣甯羗略陽一帶棉花每年由本省陸運湖北水運入本境者五六萬斤銷行本境或並本境所產之棉花分銷別境外有洋布洋緞海產食品等項由湖北水運入境銷行而綢緞服用之物多由四川陸運入境銷行間有由四川之重慶陸運入境銷行者